

**ՕՏԱՐ ՄԻ ՇԱՐՔ ԱՂԲԻԻՐՆԵՐ
ՀԱՅԱՍՏԱՆԻ ԵՒ ՀԱՅ ԺՈՂՈՎՈՒՐԴԻ ՄԱՍԻՆ
(Հնագույն շրջանի եւ միջնադարեան)**

Գոկոտ. Ա. Հ. ԹՕՓԱԼԵԱՆ

Հայ ժողովուրդի պատմութիւնը հետաքրքրական է եւ բովանդակալից: Ան հարուստ է քաղաքական իրադարձութիւններով եւ դէմքերով, ինչպէս նաեւ ընկերային-տնտեսական, մշակութային կեանքի բուռն զարգացումով: Հետեւաբար, պատահական չէ, եթէ մեր ազգի պատմութեան ազբիւրներն ու գրականութիւնը բազմազան են ու հարուստ:

Պատմագիտութեան զարգացման համար՝ սկզբնազբիւրները առաջնային նշանակութիւն ունեն: Պատմագիտութիւնը ամուր հողի վրայ է կանգնում, երբ իր տրամադրութեան տակ ունենում է տուեալ ժողովուրդի լեզուով ինչպէս նաեւ օտար բազմազան պատմական սկզբնաղբիւրներ, որոնք պատմագէտին տալիս են հարուստ փաստական նիւթ եւ հնարաւորութիւն՝ կատարելու ընդհանրացումներ եւ եզրայանգումներ:

Մարդկային հասարակութեան անցեալի պատմութեան յուշարձանները, պատմական աղբիւրները՝ իրենց տեսակի մէջ կարելի է բաժնել հետեւեալ խմբերի. նիւթական, ազգագրական, լեզուական, բանաւոր եւ գրաւոր: Թուարկուած աղբիւրների շարքին մէջ իրրեւ պատմագիտական աղբիւր, կարեւորագոյն են գրաւոր սկզբնաղբիւրները: Գրաւոր յուշարձանները հանգիսանում են պատմական ուսումնասիրութեան հիմնաքարը:

Հայ ժողովուրդի անցեալի պատմութեան եւ աշխարհագրութեան համար շահագրգիռ նիւթեր են ընծայում ո՛չ միայն հայկական պատմական գրաւոր յուշարձանները, այլեւ յունական, լատինական, բիւզանդական, արաբական ինչպէս նաեւ թրքական պատմագրական սկզբնաղբիւրները:

Օտար մատենագրութեան մէջ, Հայոց տարրեր ժամանակաշրջանների Պատմութեան վերաբերեալ պահպանուած պատմական սկզբնաղբիւրները, անշուշտ, քաղմաթիւ են:

Ներկայ յօդուածով մենք նպատակայարմար գտանք խօսել միայն մի շարք կարեւորագոյն եւ առաւել արժէքաւոր աղբիւրների մասին:

ՅՈՒՆԱԿԱՆ ԱՂԲԻՒՐՆԵՐ

Հայաստանը, իրրեւ քաղաքակրթուած հին աշխարհի անօտարելի մասերից մէկը, Պատմութեանը յայտնի էր վաղընջական ժամանակներից: Նրա հնագոյն ժամանակաշրջանների պատմութեան լուսարանման գործում յունական դասական պատմագրութեան դերը մնում է անփոխարինելի:

Հայոց վերոյիշեալ շրջանների պատմութեան մասին յիշատակութիւններ են կատարել յոյն նշանաւոր պատմիչներ՝ Հերոդոտը, Քսենոփոնը եւ Ստրաբոնը:

Սակայն յիշատակուած երրորդութիւն կազմող այս գիտական համաստեղութեան մէջ՝ Քսենոփոն Աթենացին ունի իր առանձնայատուկ տեղը: Հայաստանի մասին պահպանուած հնագոյն սկզբնաղբիւրների շարքում նրա «Անարասիս» (Հայ գրականութեան մէջ «Նահանջ Բիւրուն») աշխատասիրութիւնը, որպէս պատմական սկզբնաղբիւր, քաջառիկ է իր անզուգական արժէքով:

«Անարասիս»ի հեղինակը, առիթ ունենալով անձամբ լինելու Հայաստանում, հնարաւորութիւն է ունեցել իր երկը շարագրել իր իսկ տեսածի եւ լսածի արձանագրութեան հիման վրայ, մի հանգամանք, որը է՛լ աւելի է արժէքաւորում աշխատութիւնը որպէս պատմական աղբիւր: Հայաստանի մասին Քսենոփոնի հաղորդած տեղեկութիւնների հիման վրայ՝ իր լուսարանումն է ստանում մի ամբողջ դարաշրջան: Հայ ժողովուրդի եւ Հայաստանի մասին Աքեմենեան Պարսկաստանի ժամանակաշրջանում միակ կարեւորագոյն աղբիւր կարելի է համարել Քսենոփոնի «Անարասիս» գործը: «Անա-

բասիս» աշխատութիւնը ունի իր հայերէն թարգմանութիւնը⁽¹⁾, որը եւ օգտագործել ենք մեր այս գրութեան մէջ: Այն թարգմանել է հայ անուանի պատմագիր, ազրիւրագէտ, թարգմանիչ Սիմոն Մ. Կրկեաշարեանը, որը «արժէքաւոր ներգրում է բազմադարեան հսկայական նուաճումներ ունեցող եւ յատկապէս յոյն գրականութեան նմուշներով հարուստ հայ թարգմանական գրականութեան գանձարանը»⁽²⁾:

Նկարագրելով Հայաստանը իրրեւ ահանատես, Քսենոփոնը իր երկով հնարաւորութիւն է տալիս որոշ պատկերացում կազմել վերոյիշեալ շրջանի Հայաստանի քաղաքական վիճակի մասին: Միաժամանակ, Քսենոփոնի հաղորդած տեղեկութիւնները լոյս են սփռում գլխաւորապէս Աքեմենեան ժամանակաշրջանի Հայաստանի տնտեսական դրութեան եւ հասարակութեան ներքին կեանքի մի շարք կողմերի վրայ: Եւրոպացի Գ. Բ. Գարի (մ.թ.ա.) կէսերին, պարսկական գերիշխանութեան տակ անցած Հայաստանը՝ 521-520 (մ.թ.ա.), Աքեմենեան Պարսկաստանի տիրապետութեան տակ գտնուող մի շարք այլ երկիրների հետ, ապստամբում է Աքեմենեան գահին տիրացած Դարեհ Ա. ի (522-486 թ.թ.) դէմ, վերանուաճելու՝ կորցրած անկախութիւնը: Պարսկական զօրքերը հինգ անգամ Հայաստան ներխուժելուց յետոյ միայն կարողացան ճնշել Հայերի ապստամբութիւնը՝ վերջնականապէս հպատակեցնելով Հայաստանը: Դարեհ Ա. ը, վերամիաւորուած Աքեմենեան տէրութեան մէջ մի շարք բարեփոխումներ իրագործելով, ամբողջ տէրութիւնը բաժնեց վարչական 20 առանձին սատրապետութիւնների: Հայաստանը դարձաւ Աքեմենեան տէրութեան սատրապետութիւն՝ իր կառավարիչ - սատրապով:

Սակայն արդէն 5-րդ դարի (մ.թ.ա.) վերջերին, աշխարհակալ Աքեմենեան Պարսկաստանը ապրում էր իր անկ-

1. Քսենոփոն, «Անարասիս», քարգմ. Սիմոն Կրկեաշարեան, Երեւան, 1970:

2. Գ. Սարգսեան, Քսենոփոնի կեանքը եւ ստեղծագործութիւնը, տե՛ս «Անարասիս», Երեւան 1970, էջ 221:

ման նախօրեակը: Ահա՛ երկրի մէջ նոր բարեփոխումներ մտցնելու եւ գահին տիրելու նպատակով, 401 թ. (մ.թ.ա) Կիւրոս Կրտսերը, (որ սատրապն էր Լիդիայի, Փոնդիայի եւ Կապադովկիայի) արշաւում է իր հարազատ եղբոր, պարսից գահի օրինաւոր տիրոջ Արտաքսերքսէս Բ. Տնեմոնի (404–358) դէմ: Կիւրոսի բազմաքանակ բանակի մէջ կար յոյն վարձկան տաս հազարանոց մի զօրագունդ: Արշաւող բանակը դուրս գալով Սարդեսից, անցնելով Փոքր Ասիան, Կիլիկիայի եւ Ասորիքի վրայով մտնում է Միջագետք:

Սակայն, չհասած Բաբելոն, Կունաքսայի մօտ տեղի ունեցաւ ճակատամարտը, որը վերջացաւ անփառունակ կերպով Կիւրոսի համար: Ճակատամարտում Կիւրոսը պարտութիւն կրեց եւ սպանուեց: Ծանր կորուստներ կրած Կիւրոսի բանակը քայքայուեց: Յոյն վարձկան զինուորների փրկութեան միակ ելքը՝ ապահով ճանապարհով նահանջելու մէջ էր: Եւ ահա նրանք որոշում առնելով, Բաբելոնի մօտից շարժուելով դէպի հիւսիս, Միջագետքի եւ Կորդուաց աշխարհի եւ Հայաստանի (Կենտրոնական շրջանների) վրայով հասան Սեւ ծով, ապա այնտեղից՝ իրենց հայրենիքը՝ Յունաստան: Նահանջող Յոյն զինուորների ղեկավար կազմի մէջ էր նաեւ Քսենոփոնը: Ահա այս նահանջն է, որ նկարագրել է յոյն պատմիչը իր «Անաբասիս» նշանաւոր երկի մէջ, ուր պահուած են հարուստ եւ արժէքաւոր նիւթեր Հայաստանի մասին:

Համաձայն Քսենոփոնի, Հայաստանը «Մեծ եւ հարուստ» երկիր էր: Ահա թէ ինչ է վկայում հեղինակը. — «(17) ... Զօրավարները որոշեցին, որ պէտք է իջնել լեռների միջով դէպի Կարդուխների երկիրը. քանզի ասել էին, թէ նրանց երկիրով անցանելուց յետոյ կը հասնեն Արմենիա, որին իշխում էր Օրոնտասը եւ որը մեծ էր ու հարուստ: Այստեղից, ասում էին, հեշտ է գնալ ցանկացածդ ուղղութեամբ»⁽³⁾:

Քսենոփոնը նկարագրելով յոյն զինուորների նահանջի երթուղին Հայաստանի վրայով, տեղեկութիւններ է տալիս նրա սահմանների, գլխաւորապէս՝ հարաւային սահմանի

3. Քսենոփոն, «Անաբասիս», Երեւան, 1974, էջ 81:

մասին: Այս առումով յիշատակութեան է արժանի նրա հետեւեալ վկայութիւնը. «Այդ օրը Հելլենները դարձեալ մնացին գիւղերում, որոնք գտնուում էին Կենտրիտէս գետի⁽⁴⁾ հարթավայրից վերեւ: Գետի լայնքը համարեա երկու պլեթրոն⁽⁵⁾ է, այն սահման է Արմենիայի եւ Կարգուխների երկրի միջեւ»⁽⁶⁾:

Հետեւաբար, դատելով Քսենոփոնի վկայութիւնից, 5-րդ դարի վերջում Հայաստանի հարաւային սահմանը Կենտրիտէս գետն էր (Արեւելեան Տիգրիսը, Ա. Թ.):

Պատմիչի մը այլ վկայութեան համաձայն՝ ենթադրուում է, որ այդ ժամանակաշրջանին հայկական լեռնաշխարհը աշխարհագրական, վարչական տեսակէտից բաժանւած էր երկու միաւորի, քանի որ Քսենոփոնը, Արմենիա վարչական միաւորից բացի, նշում է մէկ այլ միաւոր՝ «Արեւմտեան Հայաստանը», որի «հիւպարքոս»ն է Տիրարագը: «(1) Գետն անցնելուց յետոյ, Հելլենները կէսօրուայ շուրջ դասաւորուեցին ու ճանապարհ ընկան Արմենիայի միջով եւ ամբողջ ժամանակ դաշտավայրով ու հողըլուրներով գնալով, անցան ոչ պակաս քան հինգ փարսախս (մէկ փարսախսը հաւասար է հինգ քմ.ի Ա. Թ.): Քանզի Կարգուխների դէմ կռիւների պատճառով գետի մօտ գիւղեր չկային: (2) Այն գիւղը, ուր նրանք հասան, մեծ էր եւ ունէր ապարանք ստորապի համար, իսկ տների մեծագոյն մասի վրայ կային աշտարակներ: Այստեղ նաեւ պարէնն առատ էր: (3) Այստեղից առաջ գնացին երկու կայան՝ տասը փարսախս, մինչեւ անցան Տիգրիս գետի ակունքը: Այնուհետեւ գնացին երեք կայան՝ տասնհինգ փարսախս, մինչեւ Տելերոաս գետը⁽⁷⁾: Այն գեղե-

4. Կենտրիտէս է կոչուել վերին Տիգրիսի արեւելեան ցիւղը, (տե՛ս Քսենոփոն, «Անաբասիս», էջ 259, ծանօթ. 7):

5. Պլեթրոն՝ երկարութեան չափ, հաւասար է մօտաւորապէս 30 մետրի, (տե՛ս՝ «Անաբասիս», էջ 245, ծնթ. 22):

6. Նոյն տեղում, էջ 88-89:

7. Այժմ նոյնացում է Արածանիի ձախակողմեայ վտակ Մեղրագետի հետ: (Տե՛ս Ն. Գ. Ժամկոչեան, Ս. Գ. Արրահամեան, Ս. Տ. Մե-

ցիկ էր, բայց ոչ մեծ, իսկ գետի մօտակայքում կային շատ գիւղեր: (4) Այս վայրը կոչւում էր արեւմտեան Արմենիա: Նրա հիւպարքոսն էր Տիրիբրագոսը, որը լինելով արքայի բարեկամը, երբ ինքը ներկայ էր գտնուում, ուրիշ ոչ ոք արքայի ձի չէր նստեցնում»⁽⁸⁾:

Յենուելով վերոյիշեալ տեղեկութիւնների վրայ, Քրսենոփոնի ժամանակաշրջանին՝ Արմենիա վարչական միաւորը ունեցել է մէկ սատրապ՝ (յունարէն նշանակում է տեղապահ, աշխարհապահ) Օրանտասը, իսկ Տիրիբրագոսը (Տիրիբրագը), որը յոյն պատմիչի մօտ անուանուած է արեւմրտեան Արմենիայի «հիւպարքոս», այսինքն փոխ կառավարիչ, եղել է հաւանօրէն Օրանտաս սատրապի օգնականը⁽⁹⁾: Այս տեղեկութիւնը գալիս է ապացուցելու, որ վարչական այդ երկու միաւորները, Աքեմենեան Պարսկաստանի կազմի մէջ մտնող իրարից անկախ տարբեր սատրապութիւններ չէին, այլ Հայաստանի վարչական տեսակէտից բաժանուած երկու երկրամասեր, որոնցից երկրորդը «Արեւմտեան Արմենիա»ն հանդէս էր գալիս որպէս առաջինի՝ Արմենիայի ենթաշրջանը: Այդ առնչութեամբ պատմաբան Գ. Տիրացեանը նշում է. «Հայկական սատրապութիւնը՝ վարչական այս ընդհանուր միաւորը, ունէր ենթաշրջանը՝ հիւպարքիան՝ «Արեւմտեան Հայաստանը», որի հարաւային սահմանները անցնում էին հաւանաբար Արածանիի ստորին հոսանքով եւ ապա հաստատապէս Հայկական Տաւրոսի Սասնայ լեռնաշղթայով, որ յաղթահարեցին Յոյները՝ Հայաստանի հարաւային շրջաններից «Արեւմտեան Հայաստան» ենթաշրջանը մուտք գործելու համար»⁽¹⁰⁾:

ԻՖ-Բայշեան, Ս. Պ. Պօղոսեան, «Հայ ժողովուրդի Պատմութիւն», Երեւան 1979, էջ 91, տե՛ս նաեւ «Անարասիս» համապատասխան ծնթ. 17, էջ 260):

8. Քսենոփոն, «Անարասիս», էջ 92-93:

9. Յ. Մանանդեան, «Երկեր», հատ. Ա, Երեւան, 1971, էջ 70:

10. Գ. Տիրագեան, «Անարասիս» եւ Հայաստանը, Քսենոփոն, «Անարասիս», էջ 227:

Քսենոփոնի «Անարասիս»ը, որպէս Հայաստանի հնագոյն շրջանի պատմութեան աղբիւր, ուշագրաւ է Աքեմենեան ժամանակաշրջանի Հայաստանի մասին տուած տնտեսական բնոյթի իր հարուստ տեղեկութիւններով: Հայկական լեռնաշխարհի վրայով իրենց նահանջի ժամանակ՝ Հելլենները, Կենտրիտէս գետից մինչեւ Արածանիի ակունքները տանող ճանապարհին եւ Արածանիի վերին հոսանքը անցնելուց յետոյ, հանդիպել են բազմաթիւ հայկական գիւղերի, որոնք ունէին բարիքների առատութիւն: Այսպէս, նկարագրելով Տելերոաս գետի մօտից Յոյների երթը, Քսենոփոնը գրում է. «(7) Այստեղից ընթացան երեք կայան դաշտավայրի միջով՝ տասնհինգ փարսախս. եւ Տիրիբազոսը իր զօրքով հետեւում էր նրանց մօտ տասը ասպարէզ հեռաւորութեան վրայ: Եւ նրանք հասան ասպարանքի մօտ, որի շուրջը բազմաթիւ գիւղեր կային, լի գանազան պարէնով: (8) Երբ արդէն բանակել էին, գիշերը առատ ձիւն եկաւ. ուստի եւ լուսաբացին որոշեցին զօրաշարքերը եւ զօրավարներին տեղաւորել գիւղերում...: (9) Այստեղ նրանք ունէին անհրաժեշտ բոլոր տեսակի պարէնի եւ բարիքների առատութիւն. մորթելու անասուններ, հաց, անուշահոտ հին գինիներ, չամիչ, ամէն տեսակ ընդեղէն: ... (13) Այստեղ իւղի շատ տեսակներ կային, որ գործածում էին ձիթաիւղի փոխարէն. խոզաճարպ եւ քնջութի եւ դառն նշի եւ բեւեկնի իւղ...»⁽¹¹⁾:

Քսենոփոնը այնուհետեւ տալիս է նաեւ հայկական այն տների նկարագրութիւնը, ուր Յոյները իջեւանել են՝ Եփրատ գետը անցնելուց յետոյ: «(25) Տներն այստեղ գետնափոր էին, մուտքը ինչպէս ջրհորի բերան, իսկ ներքեւի մասն ընդարձակ: Մինչդեռ անասունների համար մուտքը փորւած էր (հողի մէջ), մարդիկ ցած էին իջնում աստիճաններով: Տներում կային այծեր, ոչխարներ, եզներ, հաւեր եւ սրանց ձագերը: Բոլոր անասունները ներսում կերակրւում էին խոտով: (26) Այնտեղ կար նաեւ ցորեն եւ գարի եւ ընդեղէն եւ կրատերների (գինիի խոշոր կարասներ, Ա. Թ.) մէջ

11. Քսենոփոն, անդ. էջ 93-94:

պատրաստած գինի, որի երեսին լողում էին գարու հատիկներ: Կրտսերների մէջ կային նաեւ եղէգներ՝ մեծ ու փոքր, առանց ձնկի: (27) Ծարաւելու դէպքում, մարդ պէտք է եղէգի ծայրը բերանին գնէր ու ծծէր: Եւ այն շատ թունդ էր, եթէ ջուր չխառնէին. իսկ սովոր մարդու համար շատ ախորժելի ըմպելիք էր»⁽¹²⁾:

Վերոյիշեալ, իրենց տեսակի մէջ արժէքաւոր այս տեղեկութիւնները հնարաւորութիւն են ընծայում գաղափար կազմել այդ ժամանակաշրջանի Հայոց զբաղմունքի, նրանց ունեցած արտադրութեան, տնտեսութեան եւ գիւղական կենցաղի մասին: Պատմիչի կողմից հայկական գիւղերի տները երկրագործական մթերքներով հարուստ եւ լի լինելու հանգամանքի ընդժումը՝ ինքնին խօսում է այն մասին, որ այդ ժամանակաշրջանին հայ ժողովուրդի հիմնական զբաղմունքը երկրագործութիւնն ու անասնապահութիւնն էր: Զանազան մթերքների (ցորեն, գարի, չորցած խոտ՝ ընտանի կենդանիների համար, ինչպէս նաեւ ընդեղէններ, շամիչ, գինի եւ իւղի տեսակներ) յիշատակումը փաստում է հին Հայաստանի երկրագործութեան բազմազանութիւնը եւ զարգացման բարձր մակարդակը:

Ընդհանրապէս պէտք է նշել որ, Ե.-Դ. դարերի (մ.թ.ա.) սահմանազլխին՝ Հայաստանի երկրագործութեան մասին եղած տեղեկութիւնները համընկնում են ուրարտական երկրագործութեան մասին պատմութեանը յայտնի թէ՛ գրաւոր եւ թէ՛ հնագիտական տուեալներին⁽¹³⁾:

Գալով անասնապահութեանը, ենթադրում է, որ այն նոյնպէս այդ ժամանակահատուածին հայկական լեռնաշխարհում ունէր զարգացման նպաստաւոր պայմաններ, քանի որ հեղինակը իր երկասիրութեան մէջ, ինչպէս վերը տեսանք, թուարկում է Հայոց տներում իր տեսած ընտանի կենդանիները («այծեր, ոչխարներ, եզներ, հաւեր եւ սրանց ձագերը»):

12. Նոյն տեղում, էջ 97:

13. «Հայ ժողովուրդի Պատմութիւն», քաղմահատորեակ, հատ. Ա, Երեւան, 1971, էջ 456:

Այս առնչութեամբ ուշագրաւ է նաեւ պատմիչի վկայութիւնը Հայաստանում բուժուող ձիերի մասին: «(34) Խեյրիսոփոսն ու Քսենոփոնը փոխադարձաբար իրար ողջունելուց յետոյ սկսեցին միասին հարցութորձել գեղջաւագին պարսկերէն խօսող թարգմանի միջոցով, թէ այդ ի՞նչ երկիր էր: Նա ասաց. թէ Արմենիան է: Եւ դարձեալ հարցրին, թէ ձիերը ո՞ւմ համար են բուժուում: Նա ասաց, թէ՛ արքայի (պարսիկ) Ա. Թ.՝) համար իբրեւ տուրք»⁽¹⁴⁾: Նշուած է նաեւ, որ «(36) Այստեղի ձիերը փոքր էին պարսկականներից, բայց աւելի աշխոյժ»⁽¹⁵⁾: Ակնարկուում է նաեւ Հայոց մի այլ ըզրաղմունքի՝ որսորդութեան մասին: «(24) Այնժամ վաշտապետ Պուլիկրատէս Աթենացին խնդրեց թոյլ տալ իրեն առաջ գնալ, ու վերցնելով իր հետ արագաշարժներին, վազեց դէպի այն գիւղը, որ վիճակով ստացել էր Քսենոփոնը, ու գերեւաբեց այնտեղ գտնուած բոլոր գիւղացիներին եւ գեղջաւագին, նաեւ թագաւորին (պարսիկ) Ա. Թ.՝) որպէս տուրք սընուցւող տասնեօթ մտրուկների, ինչպէս եւ գեղջաւագի դրստեր, (...): Իսկ նրա ամուսինը գնացել էր նապաստակ որսալու եւ չգերուեց գիւղում»⁽¹⁶⁾:

Վերոյիշեալ տեղեկութիւնները ուշագրաւ են նաեւ այն տեսակէտից, որ բացայայտում են Հայաստանի որոշ շրջանների միջեւ եղած կենցաղային տարբերութիւնը: Այսպէս, Կենտրիտէս գետի մօտ եղած գիւղերի միջով անցնելիս, ինչպէս վերը տեսանք, Հելլենները հանդիպել էին տների, որոնց մեծագոյն մասը «աշտարակաւոր» էին, իսկ Եփրատ գետի ակունքի մօտ տները «գետնափոր» էին:

Հարկ է նշել նաեւ այն հանգամանքը, որ Քսենոփոնի «Անարասիս» աշխատութեան մէջ Հայաստանի եւ հայ ժողովուրդի մասին եղած նիւթերը լոյս են սփռում հայկական լեռնաշխարհի էթնիկական պատկերի վրայ: Միաժամանակ ատաղձ են հանդիսանում Հայաստանի Աքեմենեան շրջանի նիւթական մշակոյթի ուսումնասիրման համար: Իր ամբողջ-

14. «Անարասիս», էջ 98:

15. Նոյն տեղում, էջ 98:

16. Նոյն տեղում, էջ 97:

ջութեամբ վերցրած, այս եզակի պատմական երկասիրութեան արժէքը մեծ է որպէս հին Հայաստանի պատմութեան հաւաստի սկզբնաղբիւր:

ԲԻԻԶԱՆԴԱԿԱՆ ԱՂԲԻՒՐՆԵՐ

Հայաստանի եւ հայ ժողովուրդի մասին արժանահաւատ սկզբնաղբիւրներ են հանդիսանում նաեւ բիւզանդական պատմական աղբիւրները: Հայաստանի, մասնաւորաբար 5-րդ դարի վերջի եւ 6-րդ դարի առաջին կէսի բիւզանդական կայսրութեան ենթակայ Արեւմտեան Հայաստանի հետ կապուած մի շարք հարցերի լուսարանումը հնարաւոր է դառնում 6-րդ դարի խորագէտ պատմիչ Պրոկոպիոս Կեսարացու մի շարք աշխատութիւնների շնորհիւ: Պրոկոպիոս Կեսարացու «Պատերազմների մասին» (8 գրքից կազմուած), «Կառուցումների մասին» եւ «Գաղտնի Պատմութիւն» գործերը առատ եւ արժէքաւոր նիւթ են տալիս Հայաստանի եւ հայ ժողովրդի վերոյիշեալ շրջանի պատմութեան համար:

Սոյն յօդուածով մենք օգտագործել ենք հայ անուանի պատմաբան՝ Հրաչ Բարթիկեանի գրչով թարգմանուած «Պրոկոպիոս Կեսարացի»⁽¹⁷⁾ գիրքը, ուր զետեղուած են պատմիչի վերոյիշեալ աշխատութիւնների հատուածական թարգմանութիւնները: Կեսարացին ապրելով եւ ստեղծագործելով մասնաւորաբար Յուստինիանոս կայսեր (527-565) ժամանակաշրջանում, իր աշխատութիւններում շարադրել է Բիւզանդիայի այդ շրջանի պատմութիւնը: Նրա աշխատութիւնները ո՛չ միայն Յուստինիանոսի ժամանակաշրջանի Բիւզանդական կայսրութեան, այլ նաեւ հայ ժողովրդի պատմութեան հետազօտութեան համար անգնահատելի աղբիւրներ են:

Յուստինիանոսի ժամանակաշրջանը աղէտալի էր հայ ժողովրդի համար եւ նրա պատմութեան մոայլ էջերից մէկը հանդիսացաւ:

17. «Բիւզանդական Աղբիւրներ», Գիրք Ա, «Պրոկոպիոս Կեսարացի» թարգմանութիւն քննադրից, յառաջաբան եւ ծանօթագրութիւններ՝ Հրաչ Բարթիկեան, Երեւան, 1967:

Կայսեր կողմից հրապարակուած մի շարք հրովարտակներով Բիւզանդական գերիշխանութեան տակ անցած Հայաստանը վերածուեց սովորական մի նահանգի, Բիւզանդական օրէնքներով, ծանր տուրքերով՝ եւ Բիւզանդական զօրահրամանատարի՝ Մագիստրոսի («Magister militum per Armeniam et Pontum Polemonicum et gentes») գլխաւորութեամբ⁽¹⁸⁾:

Յուստինիանոսը իր նուաճողական քաղաքականութեամբ ընդարձակեց Բիւզանդական պետութեան սահմանները: Նուաճուած երկրները կառավարելու, այդ երկրներում իր տիրապետութիւնը ամրապնդելու, ծագած ապստամբութիւնները ճնշելու եւ ընդհանրապէս երկրի անվտանգութիւնը ապահովելու նպատակով, ամէնուրեք, ինչպէս նաեւ կայսրութեան ենթակայ Արեւմտեան Հայաստանի տարածքի վրայ, կառուցեց ռազմական բերդեր, ամրոցներ եւ զանազան ամրութիւններ:

Կայսրի ամրոցաշինական աշխատանքները սերտօրէն կապուած էին պաշտպանութեան համակարգի հետ⁽¹⁹⁾: Այս բոլորը իրագործուած էին կեղեքման գնով եւ ծանր հարկային քաղաքականութեան գործադրումով: Հայերի համար աղէտալի այդ ժամանակաշրջանի Բիւզանդական Հայաստանի ընկերային-տնտեսական, քաղաքական կացութեան, ինչպէս նաեւ այդ տարածքի վրայ կատարուած ամրոցաշինական աշխատանքների մասին հարուստ նիւթեր պահպանուած են Պրոկոպիոսի յիշատակուած գործերում: Պրոկոպիոս Կեսարացին 549-556 թուականների ընթացքում գրում է «Պատերազմների մասին» 8 Գրքից բաղկացած իր աշխատութեան եօթ գրքերը, որոնք հրապարակ են գալիս 551 թ., իսկ 553 թ. լոյս է տեսնում այդ աշխատութեան ութերորդ գիրքը⁽²⁰⁾: Աշխատութիւնում հեղինակը պատմում է Անաստասիոս կայ-

18- «Պրոկոպիոս Կեսարացի», քարգ. Հ. Բարթիկեան, Երեւան 1967, էջ VIII:

19- Նիկողայոս Ադոնց. «Հայաստանը Յուստինիանոսի դարաշրջանում», Երեւան 1967, էջ 162:

20- Բիւզանդական Աղբիւրներ, հատ. Ա, «Պրոկոպիոս Կեսարացի», Երեւան, 1967, էջ IX:

սեր (491-518) ժամանակուանից մինչեւ 553 թ. Բիւզանդիայի մղած պատերազմների (պարսիկների, վանդալների, Իտալիայի դէմ), ինչպէս նաեւ պետութեան սահմաններում վերոյիշեալ ժամանակաշրջանի, մասնաւորաբար 551-553 թթ., տեղի ունեցած դէպքերի մասին:

Այդ պատերազմները ծանր նստեցին յատկապէս Բիւզանդիային ենթակայ Հայոց վրայ: Հայաստանի նկատմամբ Յուստինիանոս կայսրը իրագործեց նաեւ հարկային ծանր քաղաքականութիւն: Բիւզանդական կայսրութիւնը՝ իր արեւելեան սահմանը պարսիկների անակնկալ յարձակումից պաշտպանելու համար, հսկայական զօրք էր կենտրոնացրել իրեն ենթակայ Արեւմտեան Հայաստանում: Այդ զօրուժը այնտեղ պահելու համար՝ կարօտ էր մեծ ծախսերի, որոնք եւ ծածկելու համար՝ իշխանութիւնները օրրստօրէ աւելացնում էին ժողովրդից գանձուող հարկերը: Այս առումով ուշագրաւ տեղեկութիւն է պարունակում Պրոկոպիոսի «Պատերազմների մասին» գիրքը, որտեղ պատմիչը խօսելով Յուստինիանոս կայսեր կողմից իր մտերիմ մարդկանցից մէկին՝ Ակակիոսին Առաջին Հայքի իշխանութիւնը յանձնելու մասին, գրում է.—

«... Որոշ ժամանակ անց Յուստինիանոս կայսեր մրտերիմ մարդկանցից մէկը՝ Ակակիոս անունով, Համազասպին (որը Հայոց իշխանն էր — Ա.թ.) գրապարտում է, մեղադրելով Հայաստանում շարագործութիւններ կատարելու եւ թէոզոսուպոլիսն (Կարին — Ա.թ.) եւ այլ քաղաքներ պարսիկներին յանձնելու մտադրութեան մէջ: Դրանից յետոյ Ակակիոսը կայսեր համաձայնութեամբ նենգօրէն սպանում է Համազասպին եւ կայսրից ստանում Հայոց իշխանութիւնը: Նա ի բնէ նենգ լինելով, հնարաւորութիւն ստացաւ կատարել ինչ որ իր հոգին էր ցանկանում, եւ իր հպատակների համար ամենազաժան մարդը դարձաւ: Նա առանց որեւէ պատճառի յափշտակում էր մարդկանց ունեցածը: Նա Հայերի

վրայ շորս կենտինար⁽²¹⁾ հարկ դրեց, մի բան, որ երբեք չէր եղել»⁽²²⁾ :

Կայսրութեան՝ հայ ժողովուրդի նկատմամբ կիրարկած այս քաղաքականութեան հետեւանքով, է՛լ աւելի է խորանում հայ ժողովրդի ատելութիւնը եւ զայրոյթը Յուստինիանոս կայսրի դէմ: Նրա բռնակալ լծի տակ հեծող ժողովուրդներին՝ հայ ժողովուրդը առաջինն էր, որ փորձեց վերջ տալ նման վիճակին: Բիւզանդիայում հաստատուած հայ որոշ իշխաններ, Արշակ Արշակունիի եւ Արտաւան Արշակունիի նախածեռնութեամբ, 548ին փորձում են կազմակերպել կայսեր սպանութիւնը, որը սակայն մատնուում է անյաջողութեան: Հայ իշխանները ձերբակալուում են: Այս դէպքերի մանրամասնութիւնները շարադրում է Պրոկոպիոսը իր «Պատերազմների մասին» երկասիրութեան եօթներորդ գրքում⁽²³⁾: Պատմիչի այս աշխատութիւնում կարելոր տեղեկութիւններ են պահպանուած նաեւ մարզպանական (Արեւելեան) Հայաստանի տնտեսական կեանքի մասին:

Հայաստանը 6-րդ դարաշրջանին՝ ներգրաւուած էր միջազգային տարանցիկ առեւտուրի ոլորտը, շնորհիւ իր տարածքի վրայով, զանազան ուղղութիւններով անցնող, Դուին քաղաքից սկիզբ առնող վեց մայրուղիների⁽²⁴⁾:

Մի հանգամանք, որ իր բարերար ազդեցութիւնը ունեցաւ Հայաստանի տնտեսական կեանքի զարգացման վրայ:

21. Կենտինար լատիներէն բառ է՝ centenarium, centum բառից, որ նշանակում է հարիւր: Կենտինարը հաւասար է հարիւր լիտրի, մօտաւորապէս 32,75 կիլոգրամ: Տես՝ «Պրոկոպիոս Կեսարացի», Երեւան 1967, ծան. 168, էջ 329:

22. Պրոկոպիոս Կեսարացի «Պատերազմների մասին», գիրք 2րդ, գրքուիս 3, «Պրոկոպիոս Կեսարացի», Երեւան 1967, էջ 80:

23. «Պրոկոպիոս Կեսարացի»․ անդ, էջ 232-234:

24. Այս մայրուղիների մասին յիշատակում է 7-րդ դարի հայ գիտնական Անանիա Շիրակացին իր «Մղոնաչափ» վերնագրով աշխատութիւնում, (տես՝ Անանիա Շիրակացի, Մատենագրութիւն, Երեւան, 1979, էջ 312-313):

Ան նպաստեց նաեւ այդ մայրուղիների վրայ մի շարք քաղաքների զարգացմանը, որոնցից յիշատակման արժանի է Դուին քաղաքը, որը դարձել էր մարզպանական Հայաստանի խոշոր առեւտրական կենտրոն: Այս կապակցութեամբ յիշարժան է Պրոկոպիոսի տեղեկութիւնն այդ ժամանակաշրջանի Դուին քաղաքի մասին. «Դուրիոսը (Դուին — Ա.Թ.) շատ հարուստ բնակատեղի է, ունի բաւական լաւ օդ ու ջուր եւ գտնուում է Թէոդոսուպոլսից⁽²⁵⁾ ութ օր հեռաւորութեան վրայ: Դաշտերն այստեղ լայնատարած են՝ ձիավարութեան համար մատչելի, կան իրար հարեւան բազմաթիւ մարդաշատ գիւղեր, ուր բնակուում են առեւտրական նպատակներով (ժամանած) մեծ թիւով մարդիկ: Հնդկաստանից, հարեւան Իրերիայից, մի խօսքով Պարսից ենթակայ բոլոր երկրներից, որոշ չափով նաեւ Հռոմէական (երկրից) ապրանքներ բերողները հենց այստեղ են իրար հետ առեւտուր անում»⁽²⁶⁾:

Պրոկոպիոս Կեսարացին 555ին գրում էր «Կառուցումների մասին» աշխատութիւնը⁽²⁷⁾, որը աշխարհագրական, տեղագրական եւ պատմական մի անսպառ աղբիւր է: Այն Յուստինիանոս կայսեր ներբողեան է: Այստեղ հեղինակը խօսում է Յուստինիանոս կայսրի շինարարական ձեռնարկումների՝ նրա օրով Բիւզանդիայի եւ նրան ենթակայ տարածքների վրայ կատարուած ռազմական, քաղաքացիական եւ եկեղեցական շինարարութեան մասին:

Հայ ժողովրդի պատմութեան ուսումնասիրման համար արժէքաւոր է աշխատութեան 3-րդ գիրքը, որը ամբողջապէս նուիրուած է Բիւզանդիային ենթակայ Հայաստանի տարածքի վրայ Յուստինիանոս կայսրի ծաւալած շինարարութեանը (քաղաքաշինութեան, բերդաշինութեան եւ այլ կառուցումներին): Մինչեւ 6-րդ դարի առաջին քառորդը՝ Բիւզանդիային անցած Արեւմտեան Հայաստանում «Կայսրութիւնը տարբերում էր հողերի երեք շրջանի, նայած ինչ աստիճանի էր նրանց կախուածութիւնը կայսերական իշխա-

25. Խօսքը Կարին քաղաքի մասին է:

26. «Պրոկոպիոս Կեսարացի», անդ, էջ 142:

27. Նոյն տեղում, էջ IX:

նութիւնից: Ինքնավար իշխանութիւններ, Ներքին Հայք եւ Փոքր Հայք»⁽²⁸⁾: Ինքնավար իշխանութիւնների կամ ինչպէս կոչուած էին՝ Սատրապական Հայաստանի տարածքը բովանդակուած էր Բիւզանդիային անցած Մեծ Հայքի հարաւ-արեւմըտեան մասը եւ Հայկական հինգ նախարարութիւնների (կամ ինչպէս անուանուած էին այդ ժամանակ սատրապութիւնների) Հաշտենի, Ծոփքի, Հանձիթի, Անգեղ տան եւ Բաւհոյսի տարածքները, որոնք գտնուած էին «Հայաստանի հարաւուած Տիգրիսի եւ Եփրատի միջեւ»⁽²⁹⁾: Փոքր Հայքը ընդգրկուած էր Կապադովկիային սահմանակից Անդրեփրատեան հողերը: Թէոդոսիոս Մեծի (379-395) օրօք, բաժնուած էր Առաջին Հայքի՝ Սերաստիա կենտրոնով, եւ երկրորդ Հայքի՝ Մելիտինէ կենտրոնով⁽³⁰⁾:

Արշակունեաց նախկին կալուածքների մի մասը, որը չըջանցուած էր Եփրատի վերին հոսանքով, կազմուած էր Ներքին կամ Մեծ Հայքը: Այդ տարածքը բովանդակուած էր Բարձր Հայքի (Արշակունեաց Մեծ Հայքի) հետեւեալ գաւառները՝ կամ նախարարութիւնները. Սպերը, Մանանդին, Դարանաղին, Եկեղեացը, Կարինը, Խորձենը, Դերջանը⁽³¹⁾:

Սակայն Յուստինիանոս կայսրի օրով՝ Հայաստանի Բիւզանդական մասը յատուկ հրովարտակով (529), ինչպէս արդէն նշել ենք, միաւորուեց կազմելով զինուորական մի շրջան, որով Բիւզանդիան հետապնդուած էր մէկ նպատակ՝ արեւելեան սահմանուած կազմակերպել ամրակուռ պաշտպանութիւն:

Իսկ արդէն 536 թ. վերոյիշեալին հետեւեց երկրորդ քաղաքացիական վերակազմութեան օրէնսդրութիւնը, որով եւ Բիւզանդիային ենթակայ Հայաստանի հողերը ենթարկը-

28. Նիկողայոս Ադոնց, "Հայաստանը Յուստինիանոսի դարաշրջանում: Քաղաքական կացութիւնը ըստ նախարարական կարգերի" (Ռուս. Թարգմ. Ա. Թ. Խոնդկարեան եւ Է. Լ. Խոնդկարեան) Երեւան, 1987 թ. էջ 39:

29. Նոյն տեղում, էջ 40:

30. Նոյն տեղում, էջ 39, 80:

31. Նոյն տեղում, էջ 58:

ւեցին վերակազմութեան: Կազմուեց շորս նոր վարչական միաւորներ. Առաջին Հայք, Երկրորդ Հայք, Երրորդ Հայք եւ Չորրորդ Հայք:

Առաջին Հայքի մէջ մտնում էին Մեծ (կամ Ներքին) Հայքը, Պոնտոսի որոշ շրջանները եւ նախկին Առաջին Հայքի մի մասը: Երկրորդ Հայքը կազմուում էր նախկին Առաջին Հայքի մնացած մասից՝ Սերաստիա քաղաքով: Երրորդ Հայք դարձաւ նախկին Երկրորդ Հայքը Մելիտինէ կենտրոնով, իսկ Չորրորդ Հայքը բովանդակեց Սատրապատական Հայաստանը⁽³²⁾: Անկասկած, այդ վերակազմութեան վերջնական նըպատակը «Երկրի քաղաքական եւ հասարակական իւրայատուկ կարգերի ոչնչացումը եւ նրա հոռոմէականացումն էր»⁽³³⁾, որովհետեւ հոռոմէականացուած Հայաստանը՝ Բիւզանդիայի համար Արեւելքի մշտական սպառնալիքների դէմ կը դառնար առաւել յուսալի պատուար:

Միւս կողմից, այդ նոյն նպատակն էր հետապնդում կայսրութեան գերիշխանութեան տակ գտնուող վերոյիշեալ հայկական հողամասերում Յուստինիանոսի ծաւալած զանազան ամբուժիւնների շինութիւնը: Անկասկած, բոլոր ամբուժիւնների վայրերը ընտրուում էին երկրի պաշտպանական նկատառումներով: Պրոկոպիոսը իր «Կառուցումների մասին» աշխատութեան 3-րդ գրքում հարուստ տեղեկութիւններ է տալիս այդ շինարարութեան մասին: Կայսրը կայսրութեան արեւելեան ծայրամասում նախ եւ առաջ ձեռնամուխ եղաւ ամրացնել սահմանային գիծը: Այդ նպատակով, Չորրորդ Հայքում կառուցեց Կիթառիճի ամրոցը, եւ Մարտիրոպոլիս քաղաքի ամբուժեան եւ պաշտպանութեան համար՝ քաղաքի նախապարիսպը: Այդ մասին վկայում է հեղինակը գրելով.

«2(. . .) Սոֆիանենէ⁽³⁴⁾ կոչուած Հայքում գտնուում է

32. Նոյն տեղում, էջ 190-193:

33. Նոյն տեղում, էջ 181:

34. Համապատասխանում է Մեծ Մովս գաւառին, որ Յուստինիանոսի ժամանակ մտաւ Չորրորդ Հայքի մէջ: (Տես՝ «Պրոկոպիոս Կեսարացի», Երեւան 1967, ծան. 163, էջ 328 եւ ծան. 20, էջ 340):

Մարտիրոսացուիս⁽³⁵⁾ անունով քաղաքը, Նիմֆոս⁽³⁶⁾ գետի ափին, թշնամիներին ամենից մօտ վայրում, որովհետեւ այստեղ Հռոմայեցիների եւ պարսիկների սահմանը Նիմֆոս գետն է: . . . Մարտիրոսացուիսի պարիսպի հաստութիւնը մօտ չորս ոտնաչափ էր, իսկ բարձրութիւնը՝ մինչեւ քսան, այնպէս որ թշնամիները կարող էին դրաւել ոչ միայն գրոհով, կամ մեքենաների օգնութեամբ, այլ պարզապէս շատ հեշտութեամբ նրա վրայից ցատկելով»:

Այդ պատճառով Յուստինիանոս կայսրը մտածեց հետեւեալը: Պարսպից դուրս հիմքեր փորեց եւ կառուցեց մի այլ պարիսպ՝ չորս ոտնաչափ հաստութեամբ, երկու պատերի արանքում թողնելով նոյնպէս չորս ոտնաչափ լայնութեամբ տարածութիւն: Այդ (նոր) պարիսպը եւս նա բարձրացրեց քսան ոտնաչափ եւ այնպէս արեց, որ բոլոր չափերով այն համընկնի նախկին պարիսպին: Դրանից յետոյ նա դեռ երկու պատերի միջեւ եղած տարածութիւնը լցրեց քարերով եւ կրաշաղախով եւ այդպիսով ստացուեց տասներկու ոտնաչափ լայնութեամբ մի կառոյց: Դրա վրայ մօտաւորապէս նոյն հաստութեամբ պարիսպ բարձրացրեց եւ դարձրեց նախկինի կրկնապատիկը: Բացի դրանից, նա քաղաքի համար կառուցեց ամուր նախապարիսպ, մի խօսքով այն բոլորը, ինչ անհրաժեշտ է քաղաքի ամրութիւնների պաշտպանութեան համար:

«3 (. . .) Կիթարիզոն⁽³⁷⁾ վայրում, որը գտնուում է Ասթիանենէ⁽³⁸⁾ կոչուած (երկրում), միանգամայն անառիկ

35. Քաղաք՝ Նիմֆոս գետի ափին: Հայկական աղբիւրներում այն անուանում է Մարտիրոսաց քաղաք: (տես՝ նոյն տեղում, ծան. 18, էջ 340):
36. Նիմֆոս գետը այժմ կոչւում է Բաբման Սու, Արեւմտեան Հայաստանում, (տես՝ նաեւ նոյն տեղում, ծան. 21, էջ 340):
37. Յունարէն անուանումը այն վայրին, որը գտնւում էր Հաշտեանի գաւառում, պարսկա-րիւզանդական սահմանի վրայ, (տես՝ Պրոկոպիոս Կեսարացի, ծան. 83, էջ 336):
38. Չորրորդ Հայքի երկրորդ գաւառն էր, համապատասխանում է Հայկական աղբիւրների Հաշտեանի գաւառին, (նոյն տեղում, ծան. 25, էջ 341):

և բոլորովին նոր ամրոց կառուցեց»⁽³⁹⁾ :

Պրոկոպիոսը խօսում է նաև Յուստինիանոսի կողմից Բիզանդիային ենթակայ Հայաստանի տարածքում գտնուող Սատաղ, Կոլոնիա, Մելիտենէ, Թէոդոսուպոլիս բերդաքաղաքների վերաշինութեան մասին՝ պատմական, աշխարհագրական, տնտեսական եւ մշակութային բնոյթի կարեւոր տեղեկութիւններ հաղորդելով այդ քաղաքներին վերաբերեալ. «Հնում Փոքր Հայք կոչուած երկրում, Եփրատ գետից ոչ շատ հեռու, գտնուում էր մի վայր, ուր հաստատուել էր հռոմէական զորագունդը: Վայրը կոչուում էր Մելիտենէ⁽⁴⁰⁾, իսկ զորագունդը՝ լէգէոն: Հռոմայեցիները հնում այստեղ ցածրադիր վայրում կառուցել էին քառակուսի ամրութիւն, որը զինուորների համար բաւականաչափ զօրանոցներ ունէր»:

«Այնուհետեւ Հռոմայեցիների կայսր Տրայանոսի (98-117) որոշմամբ՝ վայրը ստացաւ քաղաքի իրաւունք եւ դարձաւ շրջանի մայրաքաղաքը: Ժամանակի ընթացքում Մելիտենէ քաղաքը մեծացաւ եւ մարդաշատ դարձաւ: Եւ երբ ամրութիւնից ներս այլեւս տեղ չմնաց բնակուելու, հաստատուեցին (քաղաքի) շրջակայքում, ուր եւ եկեղեցիներ, վարչական շէնքեր, հրապարակ, խանութներ կառուցեցին, սինաչարքեր, բաղանիքներ, թատրոններ, (անցկացրին) քաղաքային փողոցներ եւ ինչ որ անհրաժեշտ էր մի մեծ քաղաք զարդարելու համար: Բայց դրա հետեւանքով, Մելիտենէի մեծ մասը քաղաքի սահմաններից դուրս եկաւ: Անաստասիոս կայսրը (491-518) ձեռնարկեց ամբողջ քաղաքի պարսպապատումը, սակայն նա իր ծրագիրը չիրականացրած՝ մահացաւ: Յուստինիանոս կայսրն ամէն կողմից պարիսպներով շրջապատելով այն, Մելիտենէն դարձրեց Հայոց հզօր ամրութիւն եւ զարդ»⁽⁴¹⁾:

39. Նոյն տեղում, էջ 192-193:

40. Այժմ կոչուում է Էսկի Մալաբիա (Պրոկոպիոս Կեսարացի, ծան. 40, էջ 342):

41. Պրոկոպիոս Կեսարացի, Երեւան, 1967, էջ 195-196:

Շատ հետաքրքրական տեղեկություններ է տալիս պատմիչը Մեծ Հայքում Յուստինիանոսի կատարած շինարարութեան մասին, մասնաւորաբար, երբ գրում է Թէոդոսուպոլսի (Կարին — Ա.Թ.) վերաբերեալ:

«Երբ Հռոմայեցիների կայսր Թէոդոսը⁽⁴²⁾ ստացաւ Արշակի⁽⁴³⁾ տէրութիւնը, բլուրներից մէկի վրայ ամրոց կառուցեց, որը սակայն մատչելի էր թշնամիներին, եւ այն Թէոդոսուպոլս անուանեց: Պարսից արքայ Կաուադը, երբ ուղիղ Ամիգի վրայ էր շարժոււմ, յարձակուեց եւ գրաւեց այն: Հռոմայեցիների կայսր Անաստասիոսը, մի քիչ անց, այստեղ քաղաք կառուցեց՝ պարիսպի մէջ առնելով այն բլուրը, որի վրայ էր գտնուում Թէոդոսի ամրոցը: Նա քաղաքին տուեց իր անունը, բայց, այնուամենայնիւ, նրան շրջողուեց ջնջել քաղաքի հիմնադիրի՝ Թէոդոսի անունը...: Թէոդոսուպոլսի պարիսպը բաւական ստուար էր, բայց բարձրութիւնը չէր համապատասխանում այդ ստուարութեանը: Նրա բարձրութիւնը մօտաւորապէս երեսուն օտնաչափի էր հասնում եւ գրոհող թշնամիների համար, մասնաւորապէս պարսիկների, այն շատ դիւրամատչելի էր: Նա մատչելի է նաեւ այն պատճառով, որ պաշտպանութեան համար չունէր ո՛չ նախապարիսպ, ո՛չ էլ խրամ: Բացի այդ քաղաքին մօտիկ կար մի բարձրունք, որը պարիսպի վրայ էր կախուած: Յուստինիանոս կայսրը դրա առաջն առաւ հետեւեալ կերպ. նախ եւ առաջ նրա շուրջը շատ խոր խրամ փորեց: Դրանից յետոյ նշուած բարձրունքը հարթեց եւ վերածեց անանցանելի եւ անելանելի փապարների: ...Այնուհետեւ (պարիսպը) շրջապատեց նախապարիսպով, որի իւրաքանչիւր աշտարակը մի մի բերդ էր...: Նա այնտեղ հաստատեց բոլոր զինուած ուժերը եւ Հայքերի⁽⁴⁴⁾ զօրավարին...»⁽⁴⁵⁾:

42. Խօսքը Թէոդոս Բ.ի (408-450 թթ.) մասին է:

43. Խօսքը Հայոց թագաւոր Արշակ Գ.ի մասին է, որի ժամանակ տեղի ունեցաւ Հայաստանի առաջին բաժանումը 387 թ.:

44. Պատմիչը նկատի ունի Ա. Բ. Գ. Հայքերը (տես՝ Պրոկոպիոս Կեսարացի, ծան. 45, էջ 343):

45. Պրոկոպիոս Կեսարացի, էջ 196-197:

Սատաղ եւ Կոլոնիա քաղաքների մասին Պրոկոպիոս հետեւեալն է վկայում. «Սատալա քաղաքն⁽⁴⁶⁾ անցեալում քիչ յոյսեր էր ներշնչում, որովհետեւ գտնուում էր թշնամու երկրի մօտիկ հարթավայրում, նրան շրջապատող բազմաթիւ բլուրների ստորոտում: Այդ պատճառով նա կարիք ունէր հզօր պարիսպների՝ ընդդէմ թշնամու յարձակումների:

«...Կայսրը (Յուստինիանոս — Ա.Թ.) ամբողջութեամբ քանդեց (պարիսպը) եւ նորը կառուցեց, այնքան բարձր, որ կարծես գերազանցում է շրջակայ բլուրների բարձրութեանը...: Նրա շուրջը կառուցելով նաեւ ամուր նախապարիսպ, ապշեցրեց թշնամիներին: Նա Սատալայից ո՛չ շատ հեռու մի շափազանց հզօր ամրոց կառուցեց...: Այդ նոյն երկրում (Փոքր Հայքում — Ա.Թ.) ուղղաբերձ բլրի գագաթին գտնուում է հնում կառուցուած մի ամրոց, որը Հռոմայեցի զօրավար Պոմպէոսը գրաւելով եւ պատերազմով տիրանալով երկրին, շատ ամրացրեց եւ անուանեց Կոլոնիա⁽⁴⁷⁾: Սա եւս, որ այդքան երկար ժամանակ աւերակ էր, Յուստինիանոս կայսրը վերականգնեց ամբողջ հզօրութեամբ: Նա այնտեղ կառուցեց նաեւ ամրոցներ՝ Բայրերդոն կոչուածը⁽⁴⁸⁾ եւ Արէոնը: Հայաստանի Սեբաստիա⁽⁴⁹⁾ եւ Նիկոպոլիս⁽⁵⁰⁾ քաղաքների պարիսպները, որոնք երկար ժամանակից խախտուած լինելով փլուելու վրայ էին, նա վերականգնեց եւ նորոգեց»⁽⁵¹⁾:

Պրոկոպիոսը Յուստինիանոսի կառուցումների շարքում յիշատակում է նաեւ մի քանի եկեղեցիներ եւ վանքեր:

46. Սատալան (Սատաղը) Առաջին Հայքի քաղաք էր: Յուստինիանոս կայսեր ժամանակ մտաւ Ներքնագոյն (Առաջին) Հայքի սահմանների մէջ (տես՝ Պրոկոպիոս Կեսարացի, ծան. 28, էջ 341):

47. Հնագոյն քաղաք, Փոքր Հայքում: Այժմ Կոլոնիայի տեղում գրտնուում է Կոյլի-Հիսար (Կոյուլիսար) գիւղը՝ Թուրքիայում:

48. Հայոց Բայրերդ (Բայրերդ, Բայրուրթ) քաղաքն է:

49. Ժամանակակից Սիւսք քաղաքն է:

50. Գտնուում է Փոքր Հայքում: Այժմ կոչւում է Շապին Գարահիսար:

51. Պրոկոպիոս Կեսարացի, էջ 194-195:

«Այդ բոլորից բացի, նա (Յուստինիանոսը — Ա.Թ.)
այնտեղ կառուցեց եկեղեցիներ եւ վանքեր. Թէոդոսուպոլ-
սում Աստուածածնի տաճար կառուցեց...: Նիկոպոլսում
նա կառուցեց Քառասունհինգ Սրբոց վանքը...: Թէոդո-
սուպոլսի մօտակայքում վերանորոգեց Քառասուն Մարտի-
րոսաց վանքը»⁽⁵²⁾:

Աղբիւրագիտական առումով հետաքրքրութիւն է ներ-
կայացնում նաեւ Պրոկոպիոսի 550 թ. գրուած «Անեկզոտա»
(յունարէն՝ հրապարակման ոչ ենթակայ) կամ «Գաղտնի
Պատմութիւն» գիրքը⁽⁵³⁾, որը սակայն գիտութեանը յայտնի
դարձաւ միայն 17-րդ դարում, երբ 1623 թ. նրա ձեռագիր
մէկ օրինակը յայտնաբերուեց Վատիկանի գրադարանում:
Սոյն աշխատութիւնում՝ հեղինակը նկարագրելով Բիւզան-
դական կայսրութեան տնտեսութեան անկումը, աշխատաւոր
զանգուածների ծանր վիճակը, բացայայտում է Յուստի-
նիանոսի իրագործած վայրագ քաղաքականութիւնը; մեր-
կացնում եւ քննադատում է նրա անձնական, ընտանեկան
կեանքը եւ կայսրութեան այլասերուած բարքերը: Կայսրու-
թիւնում մեծ չարիք էր կաշառակերութիւնը, որը Յուստի-
նիանոսի օրով հասաւ հսկայական չափերի: Քաղաքական,
ոազմական ինչպէս նաեւ հոգեւոր ամենաբարձր պաշտօնները
դարձել էին առուծախի առարկայ: Կաշառքով կարելի էր թա-
փանցել նոյնիսկ արքունական զօրագունդի մէջ, որը անց-
եալում կազմւում էր քաջարի ոազմիկներից եւ ինչպէս ընդ-
գծում է Պրոկոպիոսը, — «սրանց ընտրութեան ժամանակ
նկատի ունէին մարդկանց արժանիքները, եւ Հայերին էին
տալիս նախապատուութիւնը»⁽⁵⁴⁾: Իսկ «Յուստինիանոսը, —
նշում է պատմաբանը, — շատերին արժանացրեց այդ պատ-
ւին, նրանցից շատ դրամ շորթելով...»⁽⁵⁵⁾:

52. Պրոկոպիոս Կեսարացի, էջ 195:

53. Նոյն տեղում, էջ X:

54. Պրոկոպիոս Կեսարացի, էջ 296:

55. Նոյն տեղում:

ԱՐԱԲԱԿԱՆ ԱՂԲԻՒՐՆԵՐ

Միջնադարեան Հայաստանի քաղաքական ու տնտեսական կեանքի պատմութեան տարրեր հարցերի մասին՝ հարուստ նիւթ է պահպանուած արաբական միջնադարեան մատենագրութիւնում: Արաբական պատմագրութիւնը եւ աշխարհագրութիւնը հետաքրքրական եւ արժէքաւոր տեղեկութիւններ են հաղորդում Հայաստանի եւ Հայոց Պատմութեան չորս կարեւորագոյն շրջանների մասին: Արաբական տիրապետութեան, Բագրատունեաց հարստութեան, Չաքարեան իշխանութեան ժամանակաշրջանի եւ Կիլիկիայի Հայկական թագաւորութեան: Արաբական գրեթէ բոլոր մատենագիրները կապուած լինելով իշխող պաշտօնական շրջանների հետ, բնական է, որ իրենց աշխատութիւններում հանդէս են գալիս արաբական տիրապետութեան շահերի ջերմ պաշտպաններ: Հետեւաբար, յիշեալ հեղինակների հաղորդած տեղեկութիւնները միակողմանի են:

Սակայն այդ չի նսեմացնում նրանց ազբւրազիտական արժէքը: Որքան խեղաթւրուած լինեն պատմական փաստերը, եւ փոփոխուած աշխարհագրական ու ժամանակագրական տուեալները, այնուամենայնիւ արաբ մատենագիրների պատմագիտական, աշխարհագրական, իրաւագիտական ու դաւանաբանական բնոյթի աշխատութիւններում Հայոց Պատմութեան վերաբերեալ պահպանուած նիւթերը այս կամ այն չափով լրացնում են վերոյիշեալ ժամանակաշրջանի հայ պատմիչների գործերում եղած պակասը:

Արաբական արշաւանքների, Արաբների կողմից Հայաստանի նուաճման եւ արաբական տիրապետութեան ժամանակ Հայաստանում տեղի ունեցած դէպքերի մասին մանրամասն տեղեկութիւններ է հաղորդում ծագումով պարսիկ՝ արաբական մատենագիր Ահմադ իբն Եահիա իբն Չաբիր ալ Բալաձորին (Բալազորին): Նրա ծննդեան թուականը յայտնի չէ: Մահացել է 892 թ.⁽⁵⁶⁾:

56. Abu-l'Abbas Ahmad ibn Jabir al Baladhuri, Kitab Futuh al-Buldan, The Origins of the Islamic State by Philip Khuri Hitti, Beirut. 1966, p. 6.

Ալ-Բալաձորիի ամենանշանաւոր գործերից է «Քիթաբ Յըթուհ ալ Բուլտան» («Գիրք երկիրների նուաճման») (57) աշխատութիւնը, որի առանցքը արաբական նուաճումների պատմութիւնն է, սկզբից մինչեւ հեղինակի ապրած ժամանակաշրջանը: Աշխատութեան չորրորդ բաժինը, որը կրում է «Արմենիայի նուաճումը» վերնագիրը (58), ամբողջապէս նուիրուած է դէպի Հայաստան Արաբական Խալիֆայութեան ձեռնարկած առաջին արշաւանքներին, Հայաստանի եւ հարեւան երկիրների՝ Վրաստանի, Աղուանքի նուաճման, ինչպէս նաեւ այդ երկրների ժողովուրդների ապստամբութիւններին եւ մի շարք այլ հարցերին: Հարկ է նշել, որ Բալաձորիի աշխատութեան այս բաժնի ժամանակագրութեան տրեւելները շատ յաճախ համընկնում են հայ պատմիչների յիշատակութիւններին: Այդ տեսակէտից էլ արժանահաւատ են:

Եօթներորդ դարի կէսերին, Սասանեան Պարսկաստանի կործանումից յետոյ, Արաբները իրենց համար ճանապարհ հարթեցին դէպի Հայաստան: Ասորիքը, Միջագետքը եւ Պարսկաստանի մի մասը գրաւելուց յետոյ, 640 թ. գարնանը Արաբները առաջին անգամ արշաւեցին դէպի Հայաստան: Նրանք Հայաստան մտան հարաւ-արեւմուտքից եւ Տիգրանակերտի վրայով հասան Տարօն: Յաղթահարելով Հայոց դիմադրութիւնը, նրանք Վանայ լճի հիւսիսային ափերով անցնելով, մտան Արարատեան հովիտը: Նոյն թուականի Հոկտեմբերի 6-ին, գրաւում են Դուին քաղաքը (59): Սակայն այս արշաւանքից յետոյ, Արաբները չեն հաստատուում Հայաստանում: Նրանք Դուին քաղաքը եւ շրջակայքը կողոպտելուց յետոյ, մեծ աւարով եւ բազմաթիւ գերիներով վերադարձան եկած ճանապարհով:

Ծաւալապաշտ ծրագրերով պատմական ասպարէզ իջած

57. Նոյն տեղում:

58. Նոյն տեղում, էջ 305-332, (տես՝ նաեւ Բէլագորի, «Հայաստանի նուաճումը», Արաբացի Մատենագրեր Հայաստանի մասին, հաւաքեց եւ թարգմանեց Բագրատ Խալաթեանց, Վիեննա, 1919, էջ 25-77):

59. Հ. Մանանդեան, Երկեր, հատ. Բ., Երեւան, 1978, էջ 513:

արար խալիֆները, օգտուելով Արարների համար Արեւել-
քում ստեղծուած քաղաքական բարենպաստ պայմաններից,
նորանոր արշաւանքներ են ձեռնարկում դէպի Հայաստան եւ
հարեւան երկրները՝ Վրաստան, Ադուանք, նպատակ ունե-
նալով ամբողջապէս նուաճել այդ տարածքները: Այդ արշա-
ւանքների մանրամասն նկարագրութիւնն է տալիս արարա-
կան պատմիչ Ալ-Բալաճորին իր աշխատութեան «Հայաստա-
նի նուաճումը» բաժնում: Ուշագրաւ են յատկապէս, Օսման
խալիֆի (644-656) հրամանով զօրավար Հաբիբ իրն Մասլա-
մայի գլխաւորութեամբ 654 թ. կատարուած արշաւանքի վե-
րաբերեալ պատմիչի հաղորդած տեղեկութիւնները:

«Երբ Օսման, որդին Աֆֆանի, Սալիֆ եղաւ, — նշում
է Բալաճորին, — նա գրեց Մուաւիային, որ նորա կառավա-
րիչն էր Ասորիքում, Միջագետքում եւ Յունաց սահմանա-
գլխում, հրամայելով Հայաստան ուղարկել Հաբիբ իրն Մաս-
լամա-ալ-Ֆիհրին: Այս Հաբիբը քաջ զինուոր էր հանդիսա-
ցել Ասորիքի նուաճման եւ Յունաց դէմ արշաւանաց ժամա-
նակ: Այս բանի մասին գիտէր Օմար, յետոյ Օսման եւ ապա
նորա փոխանորդը: Ըստ այլոց՝ հակառակն՝ Օսման գրեց
Հաբիբին անձամբ, հրամայելով արշաւել Հայաստանի վրայ,
եւ այս տեղեկութիւնն աւելի ճիշտ է»⁽⁶⁰⁾: Մատենագիրը
նոյնիսկ չի թաքցնում արշաւող զօրքի մեծաթիւ լինելուն եւ
Հայերի ընդդիմութեան հանգամանքը: «Հաբիբ արշաւեց
16,000 ըստ այլոց՝ 18,000 զօրքով Ասորիքի եւ Միջագետքի
բնակիչներին, եկաւ Կարին եւ պաշարեց քաղաքը: Բնակիչք
դուրս ելան ընդդէմ, պատերազմեցին նորա հետ, բայց ըս-
տիպուած եղան քաղաքում պաշտպանուել եւ խնդրել իրանց
խնայել այն պայմանով, որ հեռանան քաղաքից, (խսկ մնա-
ցողները) մարդագլուխ տուրք վճարեն»⁽⁶¹⁾:

Արար հրոսակախմբերը շարունակում են նորանոր
նուաճումներ կատարել Հայաստանում: Նրանք շարժուելով
դէպի Վանայ Լճի հիւսիսային շրջանները, նուաճում են նա-

60. «Արարացի մատենագրեր Հայաստանի մասին», հաւաքեց եւ
բարգմ. Բագրատ Խալաթեանց, Վիեննա, 1919, էջ 36-37:

61. Նոյն տեղում, էջ 37:

եւ Յլաթ քաղաքը, որի «Պատրիկը» գալով հնազանդում է Արարներին «հարկ տալու պայմանով»⁽⁶²⁾:

Արժէքաւոր են Բալաձորի յիշատակութիւնները Դրւին քաղաքի նուաճման մասին: Հարիւր իրն Մասլաման նուաճելով քաղաքը, Դուինի բնակիչների հետ կնքել է յատուկ պայմանագիր, որով եւ պարտադրել է նրանց հարկատու լինել խալիֆայութեանը:

Պատմական փաստաթղթի բովանդակութիւնը՝ համաձայն Բալաձորի, հետեւեալն է. «Յանուն Աստուծոյ ամենաբարւոյ եւ գթասէրի, այս է Հարիւր իրն Մասլամայի թուղթը առ Դուինի քրիստոնեայ, կրակապաշտ եւ հրեայ բնակիչները, որոնք ներկայ են կամ բացակայ, թէ ես երաշխաւորում եմ ձեր կեանքը, գոյքը, եկեղեցիները, առեւտուրն, քաղաքի պարիսպը, եղէք ապահով, մենք պարտաւոր ենք մեր պարտքը ձեր վերաբերմամբ կատարել, մինչեւ որ դուք ձերը մեր վերաբերմամբ կատարէք եւ վճարէք գլխահարկ եւ տուրք (խարաջ-հողահարկ)՝ ականատես է Աստուած եւ նա բաւական է իրրեւ ականատես. (թուղթս) կնիքով հաստատեց Հարիւր իրն Մասլամ»⁽⁶³⁾:

Նուաճուած Հայաստանում Արարները իրագործեցին հարկային ծանր քաղաքականութիւն: Արաբական խալիֆայութեան տնտեսական հիմքը կազմում էին հարկերը: Հետեւաբար, նուաճուած երկիրների նկատմամբ արաբական խալիֆայութեան իրագործած հարկային ծանր քաղաքականութիւնը պատահական երեւոյթ չէր: Հայաստանում այդ քաղաքականութիւնը սուր բնոյթ ընդունեց, յատկապէս Արբասեան խալիֆայութեան շրջանին: Այն ոտքի հանեց քաղաքական անկախութիւնից զրկուած, տնտեսապէս քայքայուած հայ ժողովրդին եւ արաբական տիրապետութեան դէմ ծաւալուող ժողովրդական ապստամբութիւնների պատճառը հանդիսացաւ: Այդ ժամանակաշրջանի Հայաստանի քաղաքական պատմութեան, տնտեսական վիճակին, ինչպէս նաեւ ծագած ժողովրդական ապստամբութիւնների մասին անդրադարձել

62. Նոյն տեղում, էջ 41-42:

63. Արաբացի մատենագրեր, Վիեննա, 1919, էջ 44:

է արար պատմագիր Եակուբին՝ (Ահմէդ իրն արու Եակուբ իրն Ղաֆար իրն Վահր իրն Վաղըհ ալ Արբասի ալ Մասրի ալ Եակուբ), իր «Արասեանների Պատմութիւն» տիտղոսը կրող գործում⁽⁶⁴⁾։

Պատմիչը իր աշխատութեան էջերում վկայում է, որ Արբասեանների շրջանին ամբողջ Արմենիան բռնկուած էր ապստամբական շարժումներով⁽⁶⁵⁾։ Հեղինակը նշում է 15-ից աւելի արար կառավարիչների անուններ, որոնք Հայաստանում փոխուեցին յաջորդաբար՝ Հարուն ալ Ռաշիդ Սալիֆի (786-809) օրօք⁽⁶⁶⁾։ Անկասկած, դա երկրի անհանգիստ վիճակի հետեւանք էր։

Հայաստանում 850-ական թուականներին Արարական տիրապետութեան դէմ բռնկուած ապստամբութիւնների մասին առանձնապատուկ շահեկանութիւն ունեցող տեղեկութիւններ պահպանուած են պատմիչի գործում։

Այս այն ժամանակաշրջանն էր, երբ գահ բարձրացաւ Մութավաքիլ Սալիֆը (847-861) եւ փորձեց վերականգնել խալիֆայութեան երբեմնի հզօրութիւնը՝ հպատակ երկրներում։ Իր նպատակը իրականացնելու համար նա այդ երկրներում գործադրեց բռնութեան եւ հարկային աւելի դաժան քաղաքականութիւն։ Սալիֆի տեսադաշտից չէր կարող վրիպել իր անկախութեան համար պայքարող Հայաստանը։

Ան, Հայաստանի քաղաքական գործիչների՝ իշխանաց իշխան Բագրատ Բագրատունուն եւ Գահերէց իշխան Աշոտ Արծրունուն քաղաքական ասպարէզից հեռացնելու նպատակով, հարկահաւաքութեան անուան տակ, մեծ զօրքով Հայաստան է ուղարկում Եուսուֆին (որը նախապէս նոյն նպատակի համար ուղարկուած զօրավար արու Մայիդ Մուհամեդ իրն Եուսուֆի որդին էր)։ Իբր Հայաստանի կառավարումը Իշխան Բագրատին յանձնելու պատրուակով, Եուսուֆը իր մօտ կանչելով նրան՝ նենգաբար ձերբակալում եւ ուղարկում է

64. Նոյն տեղում, էջ 102։

65. Նոյն տեղում, էջ 105, էջ 120։

66. «Արարացի մատենագրի Հայաստանի մասին», Վիեննա, 1919, էջ 110-115։

խալիֆի մօտ: Այս նենդամիտ արարքը չեն թաքցրել պատմիչներ Բալաձորին եւ Եակուբին: Վերջինս՝ այդ մասին հետեւեալն է վկայում. «Հայաստան ապստամբեցաւ. բազմաթիւ տեղացի իշխաններ եւ այլք խոռվեցան եւ տիրեցին իրանց գաւառներին: Մութավաքիլ նշանակեց Աբու Սայիդ Մուհամեդ Ի. Եուսուֆին կառավարիչ, որ գնաց իւր պաշտօնատեղը: Նորա մահից յետոյ, . . . Մուտավաքիլ դրեց նորա որդի Եուսուֆին կառավարիչ: Գալով Հայաստան նա թուղթ գրեց հայ իշխաններին, որոնցից ոմանք պատասխանեցին (նորան հնազանդելու) համաձայնութեամբ: Բազրատի որդի Աշոտ գնաց նորա մօտ իրեն ապահովութիւն նուիրելու խնդրանօք, սակայն Եուսուֆ ուղարկեց նորան Մուտավաքիլի մօտ. . .»⁽⁶⁷⁾:

Այս դէպքերից յետոյ Արարները անխնայ աւերում եւ կողոպտում են Հայաստան աշխարհը, յատկապէս Վասպուրականը եւ Տարօնը: Արարների այդ սանձարձակութիւնը ոտքի հանեց Տարօնի լեռնականներին: Ապստամբութեան առաջին ազդանշանը տալիս են Խուլթի⁽⁶⁸⁾ գիւղացիները՝ ղեկավար ունենալով Յովնան Խութեցին: Ապստամբ գիւղացիները, ծանր պարտութեան մատնելով արարական խալիֆայութեան զօրքին, սպանում են նրա զօրավարին Եուսուֆին: Այդ վկայում են նաեւ արար մատենագիրներ Բալաձորին եւ Եակուբին:

Վերջինս նշում է, «Եուսուֆի հետ ճակատեցաւ Յովնան որդի (. . .) եւ սպանեց նորան»⁽⁶⁹⁾:

Հայաստանում արարական տիրապետութեան դէմ բռնկուած ապստամբութիւնները ճիշտ է յաջողութիւն չունեցան թօթափելու արարական լուծը, սակայն թուլացրին արարական իշխանութիւնների քաղաքական եւ տնտեսական հիմքերը Հայաստանի մէջ, հող նախապատրաստեցին հայ

67. «Արարացի մատենագրեր Հայաստանի մասին», Վիեննա, էջ 122:

68. Մեծ Հայքի Տուրուքերան նահանգի գաւառներից է, Սանասունգ լեռան հարաւային կողմում:

69. «Արարացի մատենագրեր Հայաստանի մասին», Վիեննա, էջ 122, էջ 65:

նախարարութիւններին, մասնաւորաբար Բագրատունիներին, հասնելու քաղաքական անկախութեան՝ ստեղծել Հայկական անկախ թագաւորութիւն:

• Հայաստանում արարական տիրապետութեան իրագործած հարկային քաղաքականութեան, յատկապէս գործող հարկային համակարգի, հողատիրական իրաւունքների եւ տնտեսական յարաբերութիւնների հետ առնչուող հարցերի լուսարանման համար՝ իր տեսակին մէջ անզուգական աղբիւր է «Քիթար ալ Սարաջ» (գիրք խարաջի մասին), մասնագիտութեամբ իրաւագէտ արաբ հեղինակ Արու Յուսուֆ իրն Իրրահիմ ալ Անսարիի (գիտական գրականութեան մէջ յայտնի է Արու Յուսուֆ անունով) աշխատութիւնը⁽⁷⁰⁾: Այն գրուած է Սալիֆ Հարուն ալ-Ռաշիդի (786-809) յանձնարարութեամբ:

8-9-րդ դարերում Արաբական խալիֆայութեան մէջ կեանքի կոչուած օրէնքների ժողովածու հանդիսացող այս աշխատութիւնը, իր ամբողջ էութեամբ, նախատեսուած էր «իրաւագիտօրէն» հիմնաւորելու արաբական բռնատիրութիւնը՝ հպատակ ժողովուրդների վրայ:

Ուշագրաւ են հեղինակի մտքերը՝ հողատիրական իրաւունքների մասին: «Բոլոր մարդիկ՝ անհաւատներից, որոնց հետ իմամը խաղաղութեան դաշն կը կնքի, պայմանով որ նրանք ընդունեն իր իշխանութիւնը եւ ապաւինեն նրա երդումի հաւաստիքին ու խարաջ (հողահարկ — Ա. թ.) վճարեն, (այդպիսիները) համարուած են գիմմիներ եւ նրանց հողերը խարաջի ենթակայ հողեր»⁽⁷¹⁾:

Այս նշանակում էր, որ արաբական տիրապետութեան շրջանին, ինչպէս հպատակ բոլոր երկրներում, այնպէս էլ Հայաստանում, աւատատէրերը իրենց հողերին տնօրինելու իրաւունք ստանում էին հողահարկ (խարաջ) վճարելով: Հետեւաբար, կարող ենք եզրակացնել, որ վերոյիշեալը, պար-

70. Արու Յուսուֆ, «Քիթար ալ-Սարաջ» (Ռուս., քարգմ. Ա. Զմիդտի): Տես՝ Գաբի Ս. Մելիք Բախշեան, «Հայաստան 7-9-րդ դարերում», Երեւան, 1968, էջ 10:

71. Նոյն տեղում, էջ 120:

զապէս հպատակ երկրների հողը խալիֆայութեան սեփականութիւն դարձնելու իւրօրինակ մի օրէնք էր, որը կեանքի կոչեց խալիֆայութիւնը՝ հետապնդելով իր տնտեսական եւ քաղաքական շահերը:

• Միջնադարեան Հայաստանի քաղաքական, տնտեսական կեանքի վերաբերեալ պահպանուած արժէքաւոր նիւթերից՝ յիշատակման արժանի են՝ 13-14րդ դարի արաբ պատմագիր, աշխարհագիր Աբու-լ-Ֆիդայի «Ժամանակագրութիւն»ում յիշատակուած Հայոց վերաբերեալ նիւթերը⁽⁷²⁾:

Հայաստանի մասին հեղինակի հաղորդած տեղեկութիւնները նպաստում են ուսումնասիրելու Կիլիկիայի Հայկական Թագաւորութեան պատմութիւնը, մասնաւորաբար Հայոց թագաւորութեան դէմ ձեռնարկուած մամլութեան արշաւանքների շրջանին: Կիլիկիայի Հայկական Թագաւորութեան եւ Եգիպտոսի միջեւ էյուբեան (Այուբեան) ժամանակաշրջանից սկիզբ առնող քաղաքական յարաբերութիւնները եւ ռազմական բախումները սուր բնոյթ ստացան մամլութեան շրջանին: Արաբ հեղինակի գործում նկարագրուած են Եգիպտոսի մամլութեան արշաւանքները դէպի Կիլիկիա, Հեթում Ա. (1226-1270), Լեւոն Գ. (1270-1289) եւ Հեթում Բ. (1289-1303) Թագաւորների օրով:

Արաբ պատմիչը վկայում է, թէ ինչպէս Հեթում Ա. ի օրով Մամլութեանը յարձակում են Կիլիկիայի Հայկական Թագաւորութեան վրայ: «Մամլութեանը, 1266 թ., ինչպէս նշում է պատմագիրը, Ալ Մալիք ալ Մանսուրի հրամանատարութեան տակ հասան Սսի երկիրը»⁽⁷³⁾: Ուշագրաւ է Արաբ հեղինակի հետեւեալ վկայութիւնը. Հայոց թագաւոր Հեթում Ա. ն «ամբարցել էր իր կիրճերը՝ քարանետ մեքենաներով եւ այլ զէնքերով եւ այնտեղ զրել էր զօրքեր՝ իր երկու որդիների գլխաւորութեամբ, որպէսզի դիմադրեն մուսուլման զին-

72. «Արաբական աղբիւրները Հայաստանի եւ հարեան երկրների մասին», (Եակուտ ալ Համաի, Աբու-լ-Ֆիդա, Իբն Շադդադ): Կազմեց Հ. Թ. Նալբանդեան, Երեւան 1965, էջ 211:

73. Նոյն տեղում, էջ 236:

ւորներին եւ արգիլեն նրանց մուտքը: Բայց մուսուլման զորքերը յաղթեցին նրանց, սպանեցին շատերին եւ գերեցին⁽⁷⁴⁾: Սպանուեց Սսի թագաւորի մի որդին եւ գերի բռնուեց միւս որդին, որ Լեւոն իրն Հեթում էր կոչուում, յետոյ մուսուլման զինուորները ասպատակ սփռեցին Սսի երկրում եւ գրաւեցին երկու Սիւների բերդը⁽⁷⁵⁾, սպանեցին բնակիչներին եւ ապա զինուորները վերադարձան հարուստ աւարով⁽⁷⁶⁾:

1292ին, Եգիպտական զորքերը, յարձակուելով Կիլիկիայի Հայկական թագաւորութեան վրայ, գրաւեցին Հոռմկըլան եւ գերեցին Ստեփանոս Դ. Հոռմկլայեցի կաթողիկոսին:

Այդ պատմական դէպքը խոր կակիծով են աւանդում հայ պատմիչները: Այն չէ վրիպած նաեւ արաբ պատմիչի ու շաղրութեան կենտրոնից: Ահա՛ թէ ինչ է գրում այդ մասին պատմիչը. «(․․․) Սուլթանը գնաց դէպի Հալէպ, որտեղից եւ ուզողուեց դէպի Հոռմկլայ եւ պաշարեց այն 691ին ջումադաախար ամսի առաջին տասնօրեակին (1292 Մայիս 20-29): Այդ բերդը Եփրատի մօտ էր եւ մեծապէս ամրացուած էր: Բերդի դիմաց նա հաստատեց քարանետ մեքենաներ, եւ այդ պաշարումը շատ աւելի խիստ եղաւ, քան բոլոր պաշարումները, որոնց մասին վկայում են ականատեսները: ․․․ Երբ ջարդն սկսուեց, մենք ականատես եղանք բնակիչների վիճակին, նրանց երթեւեկին, շարժումներին, նրանց վարքին ու փախուստին: Բերդը սրի ուժով գրաւեցին նոյն տարուայ շաբաթօրը, ու ջար ամսի 11ին (1292 Յունիս 28): Բնակիչները սպաննուեցին, եւ նրանց երեխաները յափըշտակուեցին: Այնտեղ էր ասպատանել Կաթողիկոսը, Հայերի խալիֆան, որ բնակուում էր բերդում, այնտեղ էին ասպատանել նաեւ փախստականները»⁽⁷⁷⁾:

74. Խօսքը Մառի հրչակաւոր Բակատամարտի մասին է: (տես՝ նոյն տեղում, ծան. 79, էջ 271-272):

75. Ակնարկուում է Անարգարայի մօտ գտնուող Ամուղա ամրոցը, (նոյն տեղում, ծան. 80, էջ 275):

76. Նոյն տեղում, էջ 236:

77. «Արաբական աղբիւրները Հայաստանի եւ հարեւան երկրների մասին», Երեւան, 1965 թ. էջ 239:

*

Ամփոփելով, նշենք, որ հայ ժողովրդի պատմութեան ամենագլխաւոր եւ արժէքաւոր աղբիւրները, անշուշտ, մնում են հայ պատմական եւ ժամանակագրական գործերը, քանի որ տուեալ ժողովուրդի պատմական կեանքի կենդանի վկան, եւ նրա մեկնարանը՝ նրա լեզուն եւ դպրութիւնն են:

Սակայն, ընդունելով Հայաստանի եւ հայ ժողովրդի պատմութեան մասին հայ դասական գրականութեան ամբողջ արժէքը, պէտք է նաեւ գնահատենք օտար աղբիւրների դերը Հայոց Պատմութեան հետ առնչուող տարբեր հարցերի լուսարանման գործում:

Օտար աղբիւրները է՛լ աւելի են արժէքաւորում, երբ նկատի առնենք այն հանգամանքը, որ Հայաստանի ճակատագրի առանձնայատկութեամբ պայմանաւորուած՝ հայ մատենագրութեան տուեալների պակասը, շատ յաճախ, պատշաճ մակարդակով լրացում է այդ աղբիւրներում Հայոց Պատմութեան վերաբերեալ պահպանուած հարուստ եւ արժէքաւոր նիւթերով:

ԴՈԿՏ. Ա. Հ. ԹՕՓԱԼԵԱՆ

TESTIMONIES OF FOREIGN HISTORIANS CONCERNING ANCIENT ARMENIA AND ITS PEOPLE

Dr. A. Topalian

The references used by the author are from Greek, Byzantine and Arab sources.

The first testimony is that of the Greek historian Xenophon (430-355 B.C.) in his «Anabasis» [or Account of the Retreat of the 10.000 Greek mercenaries of Cyrus the Young through Northern Asia and Armenia.].

The second testimony is that of Procopus of Cesarea (Sixth century), a historian of the times of Emperor Justinian. The latter re-allotted Armenian territory into new administrative districts and saddled its people with heavy taxes in order to build new fortifications needed for the defense of his immense empire.

The third source of testimonies is Arab :

— Abul-Abbas Ahmad Ibn Jabir al Baladhuri (9th century) wrote «Kitab Futüh al Buldän» where he gives an account of the Arab invasions from the earliest ones up till his time. The fourth book records the invasion of Armenia.

— Abu Yusuf Ibn Ibrahim al Ansari (8th century) wrote «Kitab al Kharadj», which is a jurist's account of the history of Tax policy and levying by the Arabs.

— Abul-Fida Ibn Chaddad (13th century), historian of the Ayoubi Dynasty in Egypt, gives an account of the strained relations between the Armenian Kingdom of Cilicy and Egypt, as well as of the Memeluk invasions.
